



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tir_yimym



tir yimym

TAPAK 7

Khaka maneni Sunderland nungi asayatsü

Russia-i Kostiantynivka yimti atsüngogo ta ashiba Ukraine-i magizük

VOL. XXIII ISSUE NO. 262 (ADOK 262) DIMAPUR AMUNGNÜ (SUNDAY) CHITENI (JULY) 05, 2026

₹ 5.00

July 10 nü Eastern Nagaland ajunga mokdangtsü

Kohima, July 4, 2026 (Agencies): Eastern Nagaland Peoples' Organisation (ENPO)-i July 7 nü public rally ka alitsü ayongba July 10 nung agitsü thinenba metetdaksüogo.

Frontier Nagaland Territorial Authority (FNTA) tekaratiba nung mapa tenzükang ta rongshia ENPO-i Eastern Nagaland district trok nung anepdang nungi nikongdang tashi mokdangtsü.

ENPO Central Executive Council senden aser ano Tuensang nung tribal & frontal organizations külem senden ka

nung iba lemtet agiogo.

July 10 nü Eastern Nagaland nung district headquarters ajak nung yimjung rally mapang ka nung dang agitsü. February 5 nü Centre aser Nagaland sorkartem den Memorandum of Agreement (MoA) sign sütepba pusema nungita sayuba den mapa küma inyaksü rongshitsü atema iba sentong ayongzüker ta ENPO-i metetdaksüogo.

Iba sentong matongdang jelia July 7 nü Dimapur nung MoA signatories senden ka amentsü aser idangji parnoki agreement agizükba indang kuli asütsü.

Chennai-Dimapur Train Service tenzüktsü mepishir



Chennai nung alir Naga nunger teshimtet telok kati Tamil Nadu Governor Rajendra Vishwanath Arlekar den ajurutepdang agiba noksa ka angur.

Dimapur, July 4, 2026 (TYO): 2020 nung COVID-19 wara mapang Chennai-Dimapur train service anenba tanaben tenzükshiang ta Tamil Nadu Governor Rajendra Vishwanath Arlekar dang mepishiogo.

North East India Welfare Association Chennai (NEIWAC) President aser Naga Christian Fellowship Chennai (NCF Chennai) Pastor Wapangtoshi-i anir Dr. Maongnungsang Jamir aser Ms. Kereineinuon nung July 3, 2026 nü Lok Bhavan, Chennai nung Governor Rajendra den ajurutepogo.

Iba teshimtet teloki Tamil Nadu Governor dang Northeast nunger asoshi aser talisa Nagaland aser Assam o Manipur nung tesem kar asoshi Chennai-Dimapur train ya kanga tongtipang liasü ta ashi.

Iba train service ajanga kaketshirtem, shirangertem, shishilembartem, mapa inyakerkem aser pei tasoyim semdangi aoertem kanga ajangzüka liasü. Iba train ajanga Tamil Nadu aser Northeastern region tsüngda shisaliok, rongsenketzüng, sobaliba, aser nisung o nisung tsüngda tesentaktep tongtipang liasü ta

parnokisa ashi.

Tang ya Chennai nungi apusoba train ka danga Dimapur Railway Station adena mesüir. Ibaji ajanga senzäsenbongertem mapang talila endoker mesüra senotsü teimba endoker ta parnokisa Governor den khuret lemsatop.

Iba jagi parnoki Governor dang Chennai-Dimapur train service tenzükshitsü atema mapa inyaksü mepishi. Northeastern State tem nungi nisungtem Tamil Nadu nung alir, azünger aser mapa inyaker anungji iba train service kanga nüngdaker ta parnokisa shisem.

Governor Rajendra Vishwanath Arlekar-i tebilemtsü khuret ajak angaba sülen Union Minister for Railways, Shri Ashwini Vaishnaw dangi iba khuret abentsü aser akokba tashi yariteptsü nangzüka liasü.

Tamil Nadu Governor-i parnok kanga pelashishia agizükba aser ajemalua tebilemtsütem angaba asoshi kanga pelar ta Wapangtoshi-i ashi.

Governor-i yaritsü nangzüka ajanga Tamil Nadu nung aliba Northeast nunger aser Tamil Nadu o Northeastern State tem tsüngda senzäsenbonger teimla ulushir ta paisa ashi.

CM Dr. Rio-i tractors 35 aser Tata Mobiles 6 sayatsüogo



July 4, 2026 nü Agri Expo, Chümoukedima nung Chief Minister Dr. Neiphiu Rio-i tractors aser Tata Mobiles sayatsüdang agiba noksa ka angur.

Dimapur, July 4, 2026 (TYO): Nagaland Chief Minister Dr. Neiphiu Rio-i Honibarnü Chief Minister's Corpus Fund (CMCF) kübok tractors 35 aser Tata Mobiles 6 sayatsüogo.

July 4, 2026 nü iba sentong ya Planning & Transformation Department-i Agri Expo, Chümoukedima nung ayongzüka agi.

Iba sentong nung Chief Minister Dr. Rio den Home Guards & Civil Defence, Fire & Emergency Services Advisor S. Kiusumew Yimchunger, MLA Y. Lima Onen Chang aser MLA A. Pongshi Phom nunger aden.

"Nagaland nütsüng yongsük 70% jungnüa aluyimba mapa inyaker aser iba ajanga state rongsenketzüng indang tongtoretji aluyimba lir. Nagaland nung temo aketba ali moaja lir anungji aluyimertem modern agricultural practices amshitsü ayongzüker" ta Dr. Rio-i ashi.

"Chief Minister's Corpus Fund kübok tractors aser Tata Mobiles agütsüba ya Agriculture and Allied Departments-i agütsüba dak alia talila agütsüsemba lir. Iba maparen ya aluyimertem yaritsü aser aluyimba nung tajangzüker tuluba

agütsütsü nükjidong nung inyaker" ta pai ashi.

Pa lanuwa asüdang aluyimba mapang tractor alitsüba kanga tasak liasü ta Dr. Rio-i tesüba bilemteta jembi. Mechanisation ajanga pa aluyimba nung tajangzüker tulu ngua liasü anungji beneficiaries-i machinery tajungtiba nung amshitsü ayongzüker ta paisa shisem.

Chief Minister Dr. Rio-isa beneficiary tem dang tractors mesüra tanga osettem meyokdoktsü saka aluyimba nung tajangzüker keta benshitsü ayongzüker.

"Viksit Bharat 2047 mangdang asoshi sorkari scheme balala ajanga terenlok bener aruba nung yaritettsü saka entrepreneurs, businesses aser kijatemi shilem agiba ajanga dang rongsenketzüng renloksü. Linük nung terenlok alitsü atema nübertem azükarua alitsü nüngdaker" ta Dr. Rio-isa ashi.

"State sorkari 2006-07 mapang Chief Minister's Corpus Fund kübok tractors aser power tillers lema agütsütsü tenzük. Sobaliba nungi benshia aruba ajanga rongsenketzüng merenlokba agi agricultural mechanization ajungkettsü atema

iba maparen tenzüka liasü" ta Principal Secretary & Development Commissioner, Y. Kikheto Sema, IAS-i ashi.

"Iba maparen tenzüker state sorkari Nagaland kübok tesem balala nung beneficiaries nem tractors 224 aser power tillers 262 agütsüogo. Iba maparen ya food security akangshitsü, aluyimertem taküm tajungba akümtsü aser agriculture tajungbalen melenshitsü alir inyaker" ta Kikheto-isa ashi.

"Nagaland nung agro-climatic zones aika lir aser iba jagi dragon fruit aser kiwi nungi pineapple, banana, coffee, rubber aser agarwood kanga junga tsünüteter. Nagaland nung tsünütetba ya naturally organic lir aser iba ajanga tajangzüker balaka agütsür" ta paisa ashi.

"State sorkari Financial year 2025-26 atema Mahindra aser New Holland brands indang tractors 35 den nüngdakba accessories ali. Chief Minister's Corpus Fund kübok beneficiaries 35 nem agütsütsü asoshi Rs 3.30 crore agi ali. Ano tang mezüng atema Chief Minister's Pool Fund kübok Tata Mobiles 6 alia agütsür" ta Kikheto-isa metetdaksü.

Manipur CM-i asür MLA Valte asüpila sentong nung aden

Churachandpur, July 4, 2026 (Agencies): Manipur Chief Minister Yumnam Khemchand Singh-i July 4, 2026 nü taoba Thanlon MLA asür Vungzagin Valte den asüpila sentong nung denogo.

Iba sentong ya Churachandpur kübok Dorcas Veng nung asür Vungzagin'er kidang agi. May 3, 2023 nü kin o kin tsüngda mepetmesü adokba sülen Chief Minister kati Churachandpur district semdangbaji Khemchand lir.

Tanü CM Khemchand-i Union Home Minister Amit Shah den video conference ajanga senden ka amentsü aliba agi pa helicopter ka ajanga

Churachandpur-i aru.

"Thanlon nungi asür MLA Vungzagin Valte ya kanga dang ajemalu nisung ka liasü. 2017 nung ni Manipur Assembly nung Speaker akümdang nungi pa den tesentaktep tajung lia külemi inyakasema aru" ta CM Khemchand Singh-i ashi.

May 4, 2023 nü Valte dak teka sangshiba lendong bilemteta jembidang "Iba anogo ni pa den külemi ali asübo lendong ya mataloki lila ni kanga sasaa bilemer" ta Khemchand-i ashi.

"Ni tanü kü medemer Pu Valte nem tatembang akhüm tetushi agütsütsü asoshi yangi aruogo. Pa sentong nung adenba ya kü

atema tetushi ulura. Valte'er kibong ya ozüng kibong ama lir. Pa medemertemji kü medemertem lir. Ni teti nenok ajak nüngdakba mapang yariteptsü" ta pai metetdaksü.

Manipur nung yimjung bener arutsü atema lenmang ka dang alibaji olemteptsüba lir. State ajunga renloksü atema yimjung kanga nüngdaker ta Chief Minister Khemchand-i osangbener den jembidang ashi.

Asür Vungzagin Valte indang mang ya YPA New Lamka Cemetery, Dorcas Veng nung remogo. Pai pa kinungtsü, jala ka aser jabaso ana toktsür akümlitoktsür ogo.

NHAK nung dental workshop ka agiogo



Anoop Khinchi, IAS den ketdangsür tejentem dental workshop nung shilem agiba noksa nung angur

Dimapur, Chiteni/July 4 (TYO): 'Fabrication of Monolithic Complete Denture using Polyjet 3D Printer' dak sendakba nung dental workshop ka July 4 nü Naga Hospital Authority, Kohima nung takok ngua agiogo. Iba sentong nung nisung 30 shi-i shilem agia liasü.

Workshop nung o jembiba mapang Commissioner & Secretary, H&FW, Anoop Khinchi, IAS-i ashiba agi, tang mapang ya technology ajanga healthcare melenshiba mapang lir aser iba nung dentistry-a densema lir.

Asenoki temang anepalutsü atema sentong yangluba, prosthetics design asüba aser patient tem anepaluba yimya taoba mapang dang nungi tang kanga agi takaraba melenshia odor. Digital hadirtem ya tarutsü atema masü saka tang benoka amshidar. Digital impressions nungi CAD-CAM aser 3D printing tashi nung asenoki temelenshi adokba ajangshidar. Sorkar ka ama asenoki digital dentistry ya healthcare ajaki agitettsü aser tedangshiba kümdaktsü atema tongtibang shilem ka ta reprangteter, ta

paisa shisem.

Paisa, polyjet 3D printing-i yangluba Monolithic complete dentures ya tejakleni aotsü atema jenjang tongtibang ka lir, ta ashi. Taoba mapang amshiba tasatem ya technique-sensitive aser mapang kanga agir,saka 3D printing amshiba ajanga asenoki tashi tait, biocompatible aser mapang tatsüka tsüngda monolithic denture ka yangluteter. Iba yagi patient ka anepaluba aser taküm dak indang indanga kongshir, ta pai shisem.

Khinchi-isa, iba amala workshop tem ya kanga tongtibang, kechiyong iba ajanga theory aser inyakyim na tsüngda tawa aliba sendakteptsür ta shia sentong nung shilem agirtem dang hands-on sessions mapang takokba tashi angazüktsü, ken o mejangjabatem asüngdangtsü, inyakdangtsü aser mongintem den longjemer inyaktsü ayongzüka liasü.

Maneni pai, technology renloka aoba den healthcare workforce sütepba indaktsü atema parnok nem shisatsü agütsü aser parnok tasa

renloka odaktsü atema sorkar bendanga agütsür lir, ta ashi. Riju ka kijai iba temelenshi ya tejakdangi bener motettsü. Iba atema hospitals academic organizations, industry partner aser sorkar agency tem longjemer inyaktsü nüngdaker, ta pai ashi.

Anoop-i mozükitemi clinical ground agütsür, Academia-i bushisüngdang nung teyari agütsür, Industry-i technology agütsür aser policy balalai infrastructure nongiter. Item ajak ya kodang longjemdir innovation takaraba renloka aoer aser kanga nüngdaka aliba patient tem nem treatment tasemtem agütsüteter, ta pai ashi.

Paisa, technology teyari aser NHAK nem 3d printer agütsüba atema Technology Advisor, Industry 4.0 Innovation centre dang kanga pelaba lemastep.

Paisa, evidence-based digital workflows ya agizüktsü aser 3D printing aser digital dentistry yagi center kar dang masü saka district hospital, dental college aser community clinic tem ajak ajangzükdaktsü mepeshia liasü.

Dimapur nung PPC indang district-level training agiogo

Dimapur, Chiteni/July 4 (TYO): Department of Rural Development, District Rural Development Agency (DRDA), Dimapur, Chümoukedima aser Niuland nungeri ayongzüka financial year 2026-27 atema Gram Panchayat Development Plan (GPDP) renemtsü asoshi People's Plan Campaign (PPC) dak sendakba nung training ka ayongzüka agiogo.

Training ya July 3 nü DRDA Conference Hall, Dimapur nung agiogo.

Sentong nung ojembiba mapang Project Director, DRDA Dimapur, Limameren Yaden-i, inclusive aser sustainable rural development atema Gram Panchayat Development Plan ya tamendakdak lir, ta ashi.

Paisa, line department ajak dang sentong yangluba nung shilem agitsü aser tensa dak apet, tenüngdakba aser nüburtem dak rangloker terenlok atema sentong yanglutsü atema Gram Panchayats aser frontline

worker tem den sendaktepa inyaktsü ajungshia liasü.

Sentong ya Block Development Officer (BDO), West Dimapur Jacob Zeliang-i lokti pela agizükba o jembir tenzü, shibai GPDP inyakyim takok ngua benoktsü atema ajak longjemer sentong yanglutsü aser stakeholder tem ajaki shilem agitsü koda tongtibang iba indang lemsatep.

Technical session ya District Programme Manager (DPM), Rashtriya Gram Swaraj Abhiyan (RGSA) Bichano Humtsoe-i ketdangsüa agi, shiba shisalen sayur liasü. Lai, People's Plan Campaign indang nükjidong aser framework indang metetdaktsü aser GPDP renemba inyakyim indang rasa ashi.

Laisa, lokti-i shilem agitsü koda tongtibang aser technical support aser sector-specific input tem agütsü atema line department tem shilem indang metetdaktsü.

Training nungsa Gram Panchayat ajak atema

tenüngdakba apir mapang talangka atema trenlok asoshi sentongtem yanglutsü atema stakeholder tem ajak sendaktepa inyaktsü koda tongtibang iba indang lemsatepa liasü.

Iba sentong nung line department 12 nungi ketdangsürtemi shilem agi, aser iba ajanga yimdakyimtsüng nung terenlok atema ajak ayimjema inyaktsü aser longjemer sentong yanglutsü sorkar bendanga agütsür aliba sayur.

Sentong nung shilem agirtemi, tekübokba jenjang nungi GPDP atema sentong tapet yanglutsü aser benoka inyaktsü atema department balala longjemer inyakba akangshitsü asoshi sensaksema liasü.

Department of Rural Development-i, line department ajaki jangrabangra shilem agiba aser teka amteper inyakba atema kanga pelaba lemsatep, aser ashiba agi, People's Plan Campaign takok asoshi ajak longjemer inyaktsü nüngdaker.

Chief Secretary indang official ki Census nung züngokogo

Dimapur, Chiteni/July 4 (TYO): Tang tinyakdak aliba Census 2027 House Listing Operations (HLO) kübok Kohima nung Chief Secretary of Nagaland, Sentiyanger Imchen, IAS indang official ki July 3 nü takok ngua züngokogo.

House listing inyakyim ya Deputy Commissioner & Principal Census Officer, Kohima, B. Henok Buchem, NCS aser Census ketdangsürtem matsüngda benoka inyaka liasü.

Kasa mapang nung Meriema, Kohima nung Angami Public Organization (APO) tir, ThejaoVihienuo'er kia July 3 nü Census 2027 House Listing Operations (HLO) nung züngoksemogo.

Iba inyakyim ya Deputy Commissioner & Principal

Census Officer, Kohima, B. Henok Buchem-i anir inyak aser Additional Deputy Commissioner, Chiephobozou, VekusheyiRhakho, NCS aser tanga Census ketdangsürtema densema liasü.

Ki züngoksemba inyakyim takok ngua inyakba sülen Census team aser Vihienuo nung Census 2027 HLO dak alaka Kohima district nung ken o balala indang sensaksema liasü.

Census ya koda tongtibang iba indang jembiba mapang Vihienuo-i, data shitak bendentsü koda tongtibang iba indang lemsatep, aser inyakyim ochishia benoka inyakba ajanga sentong balala yanglutsü aser terenlok atema osang tejangja agüja Naga nungertem ajangzükdaktsü ta ashi.

Health & Family Welfare dept-i metetdaktsür

Dimapur, Chiteni/July 4 (TYO): May 14, 2026 nü departmental senden nung telemtetba agiba dak ajemdaker Health & Family Welfare department-i, Health & Family Welfare Department kübok Medical Officers aser tanga medical personnel tem ajak leave agitsü asoshi benoka aliba inyakyim sülen shitak anidaktsü atema tetuyuba agütsüogo.

Officer shingaia ken o dak sendaka aliba ketdangsürtem ket nungi jelia leave memeshi pei station toktür maotsü tetuyuba agütsüogo.

Maneni Chief Medical

Officers (CMOs) aser Medical Superintendent tem shirnok leave agitsü lir parnoki requisite leave sanction agizükba den ano pei district Deputy Commissioner nem osang agütsü nüngdaker. Maneni Leave Sanctioning Authority-i leave agiba record kanga junga bendena ayutsüla, ta kasa sangdong ajanga metetdaktsüogo.

Temalen shisema aliba tetuyubatem sülen tashi anga manidakertem sorkar inyakyim dak ajemdaker merenshitsu. Iba tetuyuba ya ajaki tashi anga anidaktsü atema agütsüogo, ta Department sangdong ajangasa metetdaktsüogo.

Power department-i Peren nung awareness sentong ka agyongzüka agi

Dimapur, Chiteni/July 4 (TYO): Modern, consumer-friendly power services aser clean energy adoption ajungkettsü atema Sub-Divisional Officer (Electrical), Peren Electrical Sub-Division, Department of Power, Government of Nagaland-i, Smart Meter amenokba aser Rooftop Solar Scheme dak sendakba nung awareness sentong ka ayongzüka agiogo.

Iba sentong ya July 4 nü Peren Town Council Hall nung agia liasü.

Sentong nung sorkar ketdangsürtem, technical expert tem aser nüburtemi shilem agi, kong smart metering aser rooftop solar tajangzüng indang sensaksema liasü. Inyakyim anaprongla ya power sector modernise asütsü aser renewable energy amshitsu atema sorkari merangdanga aliba nung tongtibang shilem ka lir.

ANVIL nungi shisalen sayurtemi smart meter dak sendakba nung technical presentations agütsü. Parnoki accurate billing, real-time electricity consumption monitoring aser improved energy management amala feature tem indang metetdaktsü.

Elmechent Enterprise (RTS Vendor) & A&D Solar (RTS

Vendor) nungi ketdangsürtemi Rooftop Solar Scheme indang metetdaktsü. Parnoki subsidy balala agütsüba, installation inyakyim aser consumer temi peisasa electricity produce süa long-term saving tem indang tangazükba agüja liasü.

Sentong nung o jembiba mapang ADC Peren Robin, AE (Electrical), Peren, Er. Tsiamchi Ndag, aser Peren Town Council mendenbuba Mireulung nungeri jila nung alirtem dang item inyakyimtem nung shilem agitsü ajungshiba den smart metering aser solar energy ajanga electricity tajungba amshitsu, power amshiba jenjang tajemba kümdaktsü aser sustainable development asoshi teyari agütsü ta ashi.

Sentong ya SDO (Electrical), Peren Er. Kidosap lenisüba nung agi, Sentong nungsa Peren Town Baptist Church Pastor Haiku Nza-i Tsüngrem temaotsü meshizüka sarasadem aser lokti pela agizükba o jembiri smarter aser greener energy solutions dangi meyipba mapang nüburtem nem tangazükba tali agütsü koda tongtibang iba indang lemsatepa liasü.

Sentong ya JE (Electrical), Peren Er. Nguyunglo Kesen-i tepela o jembir tembang liasü.



TIR YIMYIM YIMOBILEM (EDITRIAL)

DIMAPUR SUNDAY, JULY (CHITENI) 05, 2026

Mapa tulu atema tila nüngdaker

Alimaibo tuluka aser aika nung dang temulung alemer saka Tsüngremi aiben Pa tashi aser Pa temeim sayutsü atema tilaka aser ishika nungi tenzüker. Yisui kotak yimli indang o entepba jembidanga kotak yimlji tilaka agi dang atishia jembu. Asenoki bilemtsü agibo, kotak yimlji tuluka aser tesüngmangtsü tobur tajung agi atishia o entepba ka ashitsü amai bilemtsü südi. Saka Yisui ashi, "Kotak yimli jibi metsüjang ka mesüker..... Ibai metsüjang tilatiba saka kodang aji ainer tsünüsembongtsü ajak dang tuluba akümer...anungji anüng ozütem aruagi iba kongsang nung alir." (Mathi 13:31-32). Ano, Yisuisa ashir, "Kotak yimlji piyazü mesüker," (Mathi 13:33). Iba piyazü jagi am tila ka nungi amtsük tulu ka kuma pokraka atudaktsür. Atangji, jibi metsüjangji kanga tila saka kodang ibaji ainer, Yihuda lima nung balaka, ibaji süngdong kuma ainer anungji ozütem aruagi metsüjang tilaka nungi adokba süngdong kongsang nungji anisüngzüker. Aji oda, asenok kotak yimli angutsüba jibi tamasayongi takar aküm nung dang mesüra tulu aküm nung dang angutsü amai bilema alitsü akok. Kotak yimlji jibo tangar ajaki junger ta tenük sünga repranga aliba nisung aser kibongiang angutsü amai asenoki bilema alitsü akok. Ajisüaka, Yisui ashir, kotak yimli angutsüba jibi tila ka nungi tenzüker. Nü dak tangari manguba sempet tilaka alitsü akok mesüra nür kibongi inyaktetsüba mapa tajung tila ka anunga alitsü akok. Ashiko, itemji nür atema kotak yimli mesükba metsüjang aser piyazüji asütsü akok. Iba sempet tilakaji aser aseni inyaktetsüba mapa tila ka jagi asensasa asen tenükmesügi malitsüla. Onsara tila asünungji, aiben asenoki essh ! ya kechi sütsü ta bilemer. Saka Tsüngremi nü taküm aser nür kibong ajanga mapa tulu inyaktetsüba jibi nai tenük mesügi yutsüba sempet, jala jabaso, tsürabur aser mapaji asütsü akok. Tsüngremi tuluka nungi tuluka kümdaktsüba nung temulung masür saka jibijang ama tila ka nungi süngdong tuluka kümdaktsüba aser piyazü tila ka agi amtsük tuluka poraka atudaktsütetba ama, tila agi tulu kuma inyaktetba mapatem nungang Pai Pa taochi aser tashi sayuner. Alima nung kodangsa nübortem timtema alaashi tia nung liasü, itemji anitetsü atema Tsüngremi chubatem mesüra tulu aser takar metenya saka kibong tila nungi kinü tanur kümer Mosa aser Yohan Baptitsüba nunger ama yok. Aji oda, Yisua tamasayongi anüng len nungi mepet langpang mener nisung ajaki akümtsübuttsü maru saka tilar kibong ka nungiang kinü tanur kümer aru. Kodang, lokti tulu adenshia yur chiyongtsü maka aküm, pai dokan nungi chiyongtsü peria bener arudaktsütsü koka liasü, saka tanur ka ket nung ango ana aser amtsük pongo bena aliba chiyongtsü tilaka nung jagiang aika kuma ajak peria chiyonger anüngtsüsa moatsü. Kotak yimlji ibaji aser asenoki anogo shia iba yimlji arung ta sarasadem. Asenok taküm aser kibong nung tepela malitsü akok saka asenoki akokba o tajung tila kati mesüra tilaka aremzüka agi, memeteti tepela tulu arur alitsü. Asenoki aiben aika aka nung dang pelaa alitsü amai bilemer mesüra aika asünung dang akoktsü amai bilemer saka Tsüngrem bilembajibo yamaji masü. Israel nunger Media nungertem anema rarai yokdang Tsüngremi Media nunger meyerijang aika den raratsü atema Israel nunger sepai noklang asem dang yok aser akok. Yisui Pa den yariteptsü atema nisung 12 dang shimtet. Ibai tesüngmangtsüka lir. Aseni asübo nisung 12 masü meyerijang ter ana shimla ta bilemer. Ajisüaka, Tsüngrem bilembajibo yamaji masü. Aika asüba agi masü saka ishikati süaka, Pa den temulung lemtetsüsa jajara item jagi alima akoker ta Tsüngremi asenok nem angatetdaktsüner. Aji oda, nai na tilar ama bilema alitsü akok mesüra na akaba agi nai tenük mesügi bilema alitsü akok, saka na jibijang dang nungibo tuluba aser piyazü dang nungibo tashi taitba. Tilaba asüba agi pelaang kechiyong Tsüngremi na amshitsü aser tuluka kuma moatsütsü.

OLEMSABANG

Ochi-ji tashiyim agi nembanga meyutetsü

~ L. Kika Pongener

(Yashi adok nungi...)

Tesasatsü-ka tanü putu nung asen lima nung; yimden, arogo aser loktiliba teimba ka nung, ochi aser shitakba nem anidaktsür masü; saka tashitemetet, rongsen aser lokti tashi dak nendaker; tashiyim agi ajepbanger loktiliba ajak aniba angudang kanga sasar. Tanü asen lima nung loktiliba teimba ka nung ken o telemtetba agidang; ochi nung ajemdaker masü; saka tashiyim agi ajepbanger (Might is right) telemtetba agiba angudang kanga sasar. Yongji, tanü loktiliba aika nung ochi telemtetba magiteter. Ibajagi, tanü asen lima nung yimden, arogo aser loktiliba aika nung mepetmesu adoker aser telemsa-a adoker. Tanü putu nung lokti lennir aika ochi nung tasü-ita menokdaki seplasepshiba angudang kanga sasar. Atangji, tanü asen lima nung; yimden aser lokti aika nung tashiyim agi ochi nembanga ayutsü merangba angudang kanga sasar. Anungji lokti ajak nung lenniri ochi nung akang-akanga soitter yimsu asütsüla aser ken o ajak lemtetsüla aser alangdangtsüla.

Koba linuk, koba yimden aser koba telok nung sudir suaka; linuk ka, yimden ka aser lokti ka tashi-ita, longjema telemsatep makai anitsü atema; lennirtemi nubur mulungjang metetsüla; nubur tebilemba aser taginuba metetsüba jibi kanga-sa tongtipang lir. Aji oda, lennirtemi nubur mulungjang mangu ser, mesura nubur taginuba aser tebilemba memeteti anira; mapang kar nungpo...."Poru lung nung chitak amai chitaka ayutsü". Akhi putu nung tanü amai 'Social Media' sabang makaba agi nuburtemi pei tebilemba, tangatetba aser taginuba lemsatepdak sabang ka makaba ajanga alimaji tamang lima ka mesuka; pei among sungkümshi nung shibanger; pei pei litepba agi alimaji koda aor (?) Kechi jenjang lir (?) Nubur kong nokdaka lir (?) Itemji kecha memeteti lia aru. Ajisuaka, tanübo Social media sabang akaba ajanga kati ka metettepa, nubur tebilemba, tangatetba aser taginuba osangkaket nung lemsatepa züluba ajanga; nubur mulungjang angur. Yongji, lennirtemi tetsükdaktsü makai linukji anir aor. Koba linuk, koba yimden aser koba lokti nung lennirtemi; nubur nungi shisatsü agir; nubur taginuba meteta anir; iba linuk, iba yimden aser iba lokti nungji yimjung, tesunep aser telongjem alitsü.

Kanga tesasatsüka, tanü asen lima nung sobaliba tentet tamajungtiba kaji....Osangkaket nung nuburtemi pei tebilemba aser tangatetba lemsatepa züluba; yimden bangdak aser lokti tashi amshia amokmerena nubur nem pei tangatetba aser tebilemba melemsadaktsüi songdema/ajepbanga ayutsü merangba; iba yabo tashiyim agi ochi ajembanga ayutsü merangba mapa ka asütsü. Aji oda, iba ama sobaliba tentet yabo tanü putu ama tejakleni aoba putu nungpo kanga-sa mapet lir. Tanü asen lima nung Politician kari pei mapa nung nubur mulung masütsüsa inyakba anema kija aser lokti kari ola adokra....Iba anema par kin, par yimer aser par kidong jagi tepo kuma meyiper nuburtemi amokmerenba....Iba ama sobaliba tentet yagi tanü asen lima nung terenlok malir aser ochi mapa sadem-sadema meinyakteter. Iba ama sobaliba ya angudang kanga sasar.

Koba linuk, koba yimden aser koba telok nung nubur nem pei tebilemba aser tangatetba melemsadaktsüi tashiyim agi amokmerena alenbanga aser songdema yudir....Iba linuk, iba yimden aser iba telok dangji tejakleni aoba lokti ka ta majatsü. Aji oda, kechi koma ka nembanga ayutsü merang-aka; ochi-ji kenubo temeden angutsü aser yimjak nung jungkai adoktsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

YWAM-i FIFA World Cup mapang maneni outreach campaign agir



2026 Fifa World Cup nung Khristantemi mamangertem aika aliba linüktem atema sarasademtsüdang tangokba noksa nung angur.

July 04, 2026: 2026 FIFA World Cup 'knockout stages' atongba sülen missionary movement Youth With A Mission (YWAM)-i maneni Canada, Mexico aser United States tesem ajaklen outreach ministry inyakdar. World Cup asaya mapang nung YWAM-i iba asaya ayongzüka akaba yimtitem nung Khrista osangtajung lemsatepba den külemi lokti tenzüker aser cross-cultural ministry mapa inyaker. Tang alima tesem balala nung YWAM indang sports ministry initiatives 125 shi lir aser item ministry nungjagi ,inistry 100 jungnüabo football asaya den sendaktepa lir. Canada, Mexico aser US tesem balala nung YWAM ministry centers-i Arogotem

aser international volunteers ayongdena alima tesem balala nungi iba asaya reprangi arurtem den Khrista osang lemsateper. YWAM teams-i soccer camps ayongzüka akar aser Khristan kakettem lema agütsüdar. Tawa YWAM show ka nung YWAM host, Lydia Huguen Toppler-i, "Küsa oshi mejembirtem den-a Khrista osangtajung lemsateptetsüsa saisapong ajanga lenmang balaka lapoktsür," ta metetdakja liasü. YWAM-i mezüing 1972 küm Munich Olympics mapang nung outreach campaign tenzüka volunteer 1,000 shi Germany-i yoka liasü. Iba kümji kiralongrartemi Olympic Village amakba sülen YWAM team-i yimti tiyong nung

mangyimertem melung süngzüksüba den külemi parnok atema sarasademja liasü. 2000 Sydney Olympics, World Cups balala aser tawa France nung Summer Games aliba mapang nunga YWAM-i outreach campaign agiogo. YWAM-i July 17 nungi July 25 tashi Montreal Jubilee ayongzüka akatsü. 1976 küm Montreal Olympics nung yimti lenmangtem nung sayutsüngirtemi asentenshi milak tulu jangruba ajangshiba sülen taküm küm 50 ajungba nüngtem nung iba Jubilee ayongzüka. Anogo 9 nü sentong nungji tamangertemi Montreal nung moapu nung sarasademtsü, tekülem sentong agitsü aser sayutsüngitsü.

Release Intl' nüngja 'Voice of Persecuted Christians' ta melenogo

July 04, 2026: Khristan melungtet telok Release International-i ministry nüngja 'Voice of Persecuted Christians' ta melenogo. Reshikangshi ajangshiba Khristantem atema jembitsüba aser reshikangshi ajangashiba Khristantem otsü UK Arogo den lemsatepba maparen tali shisangtsü nükjidong nung parnoki nüngja melen. Küm aika parnoki Release International ta nüngja amshia aruogo, ajisüaka tang nungibo Voice of Persecuted Christians ta ministry nüngja amshitsü. CEO, Paul Robinson-i, "Iba nüngja tasenba ajanga onok indang ministry tetezü tajungba ratettsü ta onoki amanger; reshikangshi ajangshiba Khristantemi yangi UK nung aliba Arogo nung parnok otsü lemsateptettsü," ta ashi. "Tesüiba küm aika onoki reshikangshi ajangshiba

Khristantem den tesendaktep yur inyaka aruogo," ta pai metetdaksü. "Atangji onoki reshikangshi ajangshiba Khristantem ayimdenba ola angashir, aser parnok kuli ajanga nütsüngtsüba mapa taliba inyaktsü ajungmesor-Khrista tiyongtsü südaktsür taküm alitsü, Pa tenzüksü aser kechi nung lidir liaka osangtajung lemsateptsü atema ajungmesor," ta paisa metetdaksü. Voice of Persecuted Christians ya mezüing 1968 küm tentet, aser tongti nükjidongji eastern Bloc nung Communist yimsüsüba kübok reshikangshiba Khristantem tenzüksü atema liasü. Romanian nunger pastor, Richard Wurmbbrand küm 14 tashi tepuokdak liasü aser pai ajangshibatem nung ajemdaker pai "Tortured for Christ" ta ser kaket ka zülü. Tesüsa Norwegian

nunger Khristantem teyari ajanga Wurmbbrand-i Romania toktsür US-i ao, iba sülen pai Voice of the Martyrs tenteta liasü. Iba telok yagia reshikangshi ajangshiba Khristantem yarir. Cold War tembangba sülen Release International kübok parnoki alima tesem balala nung reshikangshi ajangshiba Khristantem yari tenzüka liasü. Tanübo iba ministry yagi linük 30 nung inyaker aser parnok indang partners-i reshikangshi ajangshiba Khristantem nem shi aser tanela nüngdak agütsür. Robinson-i, "Onoki inyakba mapa aser inyakyim kecha memelenshi. Onoki maneni reshikangshi ajangashiba Khristantem meima tenzüksü. Iba denji külemi UK Arogo atema ozü ministry-i tongtibang shilem agitsü," ta metetdaksü

ANOGO ABEN TSÜNGREM DEN

NA SHIBA DAK JENOKTSÜ?

"Kechiaser na aolen ajak nung kümzüksüsa Pai kotak tenyartem nem ozüing agütsütsü"
~ T.Ken 91:11.

Timtem toushi ya alima nung den teti alitsü. Saka item ajak ya liaka, asenoki dang ochi tanela agi asen Tsüngrem den tesentaktep shitak lira, Tsüngrem asen den teti alitsü?, yaritsü, kümzüksü aser aochitsü. iba T. ken zülusangi pa dak ajangshiba kuli agütsübaji, asen dang shitak lira asen kechi nung lidir, odir Tsüngremi kümzüksü. Atangji asenoki metettsübaji, asen Tsüngrem ya ajak madak takoksang, teküzmüker aser asen jenokdakji Pa dang lir. Tanü asen lima reprangdangra tebilemstü khuret teimba adoker. Iba putu jongdak aseni teti ajurubaji, alima temenen jenti tamai jateta adokba, aser warashira tasen jenti poktetba, rara teimba adoker, yimjiyimjung raksar teimba aser tamajung meimer teimba zünba asenoki angur. Süra, iba tia ka nung asenok taküm koda alitsü? kong jenoktsü? Ano aikadi bilembaji, asenok asoshi teimla lir mali? Dawidi T.Ken 91 nung ya asenok nem teimla o agütsür. Kechiba asenoki alima temenentem tsübutsü, Kechiba asenok teimla samatsü; Kechiaser asenok asoshi teküzmükerji aseni amangba Tsüngremi teti pai asen nüka lir aser Pai kotak tenyar asen jakdang yoker aser kümzüker. Saka aseni dang shitak amangtsüla, meimtepba ozüing nung jajatsüla, aser Pa o nung ashibatem shitak benshitsüla "Shibai tematiba jenokdak alir, Pai ajak takoksang akümbol nung alitsü"....Iba ya asen Tsüngrem tenangzüka lir. Asenol iba tashi tamang nung lidi aser jajadi. **SARASADEM:** Oh Tsüngrem, onok dak tajung kecha meliaka, Ne taocha ajanga nai onok nem teküzmükba lenmang lapoktsü nung kanga pelar. Amen

England nung Evangelical Council-i ita piyong sarasadem ayongzüker

July 04, 2026: Church of England (CoFE) indang General Synod nung kasa atsüapong kibong akümba dak sendakba Rev. Dunnett-i, onük nung o lemteptsü lia Church of England Evangelical Council (CEEC)-i Khristantem dang ita piyong linük aser Arogo atema sarasademtsü ayongzükogo. CEEC-i England nung aliba Arogotem aser Khristantem dang July ita piyong anogo shia lemzüksüba Lai zünga sarasademtsü ayongzükogo. Professor Helen King-i Private Member's Motion ka benoka lir aser iba nungji yamai zülua lir, "Kasa atsüapong aliba nung Synod-i tashishiba kecha mali aser iba ama tesendaktep kaji Khristan nütsüngsüba den puteptsü akok." CEEC-i, iba motion nung zülua alibatemi kanga sangra-a züluba lir aser atsüapong tsütsü Arogo tangatetba melenshitsütsü atema lir, ta metetdaksü. CEEC National Director Rev. John Dunnett-i, "Karibo iba ya General Synod-i kecha balaka pu masemer ama sayur ta bilemstü, ajisüaka iba motion ya Laishiba tesayuba aser

Arogo tangatetba nungi pilar parnok tebilemba benoktsü atema lir," ta metetdaksü. Rev. Dunnett-i, sarasademba ita dang 'PRAYJuly' ta ajar, aser iba ya Arogo tamang asentenshitsü aser kulisüba atenshitsü atema lir, ta ashi. "Anogo shia asen linük nung Khrista osangtajung lemsateptsü atema maongka anguba atema onoki sarasademtsü aser tenüngsang agütsütsü," ta pai ashi. "Onoki linük tesem ajaklen evangelicals dang Church of England atema sarasademtsü aser Arogo kulisüba mapa inyakba atema sarasademtsü ayongzüker. Nisung aikati Yisu Khrista agizüksü atema asenoki sarasademtsü," ta metetdaksü. "Atangji mapang ajak nung Church of England-i asen sarasadem nüngdaker, ajisüaka July ita nung sarasademba ita ya talisa General Synod nung rangloker ayongzüka, kechiyong iba Synod nung kasa atsüapong külemi aliba aser shi nung medemba tsütsü tangatetbatem onük nung ajemdaker o lemteptsü sentong lir," ta paisa metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Yipden**

(n) mejangtsü yangluba oset (bed)

* Ozü kidang yipden ter lir.

Yipok

(adv) yin ama ka nung sü itaker shisa (torn by hooking)

*Kishi nung aliba yin agi kü tula yipok.

OLONG PAITEP # 7555

	1		2			3		4		5
6								7		
					8		9			
			10							
11										
				12						
13		14		15						16
17								18		

TIPLIN

1. Inyaker ajangtetba
3. Bangsemo adokdak
6. Shitak mesüi inyak
7. Ya mimong nung angur
9. Repranzük
10. Tasola
11. S _____
13. Yagi ajak ashioktsür
15. Ki aokba oset
17. Ak shi nung inokba tasen
18. Ishika

LANGTSÜNGLEN

1. Meshidak
2. Tanaben soshir
3. Iba anogo
4. Meshi
5. Yagi mi tsükloker
6. Shi tapu ka
8. Yagi ayimer saka ozü masü
9. Ajokba shiruru ka
12. Inyaktet
14. ____ hi
16. Akümüli nungi pilar

OLONG PAITEP # 7554 TELANGZÜBA**TIPLIN :**

1. Tansütsü, 4. Mojing, 5. Pila,
6. Masü, 7. Nok, 9. Pio, 10. Putu,
12. Jung, 13. Tzüwar, 14. Tsüngrem.

LANGTSÜNGLEN :

1. Temola, 2. Saisapong, 3. Alar,
5. Pongtsüng, 8. Shirem, 11. Ajak.

NAI-A YA METETTER

Pisa, Italy nungi kaketshir telok kati alima nung "paper airplane" tulutiba yangluteta Guinness World Record ka yangluogo. Iba tayimtsü dang Icarus ta ajar aser aeronautical engineering techniques amshia glue aser paper agi dang yangluba ajanga feet 194 yima otet. Iba paper airplane nung 65-foot wingspan keta lir.

Arunachal MLA Phurpa Tsering-i ita 7 itasen tenlar**Itanagar, July 4, 2026**

(Agencies): Arunachal Pradesh kübok Keyi Panyor district nung tawa tzümetsüng aser anentsüh lendong balala agi kongshia aliba kibongtem yaritsü asoshi Dirang MLA Phurpa Tsering-i pa indang ita tenet

itasen tenlaogo.

Phurpa Tsering dang Awo Phurpa ta ajar aser relief & rehabilitation efforts nung yariteptsü atema itasen tenlaogo.

Arunachal Pradesh nung tensa tamajung ka ajurua lir

anungji nübortemi alima lendong balala agi takoksa bentsür arutsürtem yaritsü mepishir ta MLA Phurpa Tsering-i metetdaksüogo.

"Dirang nung alirtem aser lennirtemi tzümetsüng agi kongshia alirtem yaritsü ayongzüker. Iba ama mapang tamajung nung akokba tashi teyari agüjangma" ta MLA Phurpa-i ashi.

Arunachal Pradesh nung lendong tulutiba ajurubaji Keyi Panyor district lir. Iba district nung ajungben tzümetsüng aser anentsüh tulu ajuruogo aser lendong balala nung kiojen raksaba den nisung takütem samaogo.

Air India Express-i 'Voices of the Land' docuseries sayaogo**Guwahati, July 4, 2026**

(Agencies): Air India Express-i 'Voices of the Land: Tales of Northeast' ta ser documentary series ka sayaogo.

Iba ya Northeast India nung lisopurtem indang senmang, inyaksangshi aser tebang putiotsü indang documentary series ka lir aser iba ya shilem trok lemsaa lir.

Iba series ya Edstead aser Dentsu Sports and Entertainment den yaritepa adok aser July 3 nü JioHotstar nung mezüing sayaogo.

Iba series ya actor Adarsh Gourav ajanga host asür aser Nagaland nungi Angami, Assam nungi Biata o Mising,

Meghalaya nungi Khasi aser Arunachal Pradesh nungi Sherdukpen nunger indang sayur.

Iba documentary ya Air India Express indang 'Tales of India' initiative nung shilem ka lir. Iba maparen kübok Air India Express-i literature, art, festivals aser storytelling ajanga sobaliba aser senmang prokshir.

Air India Express-i parnok fleet liveries nung Northeast nungi traditional art forms aser weaving patterns amshir.

Nagaland nungi Tsüngkoteptsü, Manipur nungi Akyobi, Saphee Lanphee & Moirang Phee, Assam nungi Gamosa & Jaapi, Meghalaya

nungi Khneng from Mizoram nungi Puanchei amshir.

Iba documentary ajanga Northeast nung lisopur senmang aser lipoküm den tesentaktep sayunür ta Air India Express Chief Marketing Officer Siddhartha Butalia-i ashi.

Air India Express-i tang Agartala, Dibrugarh, Dimapur, Guwahati aser Imphal nungi weekly flights 290 tema senzür.

Parnoki tawa tu Northeast nungi direct international services tenzükbba metetdaksüogo. Iba ya August ita nung Guwahati nungi Abu Dhabi aser Dubai tashi international services tenzükbba lir.

Chota Tingrai Tea Estate ajanga mezüingbuba Matcha tea adoker**Guwahati, July 4, 2026**

(Agencies): India nung Matcha tea mezüingbuba adoka ayokba state ji Assam lir aser iba ya Tinsukia nung

Chota Tingrai Tea Estate ajanga linük nung mezüingbuba commercially manufactured batch sayaba ajanga otsü yangluogo.

"Iba ya Assam nung tea industry wadang tali ulushiba lir aser alima nung Assam Tea jenjang tajungba akümtsü" ta Chief Minister Himanta Biswa Sarma-i ashi.

"Nenoki sapuba Matcha

brew tang nungi Assam nung yanglutsü. Asen süngo senmang tajungba kümdakja Tinsukia nung Chota Tingrai Tea Estate nung Matcha tea yanglur aser iba ya India nung mezüingbuba lir" ta pai ashi.

Iba ya India-Japan collaboration ajanga inyaktet aser Guwahati Tea Auction Centre (GTAC) nung first batch ajanga jenjang tajung nguogo ta CM Sarma-ia ashi.

Chota Tingrai Tea Estate-i tesüiba küm ter tashi Japanese tea manufacturers, agronomists, equipment suppliers aser tea

experts den külemi inyaksema aru. Iba estate nung automated Japanese tea manufacturing facility ka lir.

Guwahati Tea Auction Centre. Lot No. 7001 nung Indian-produced Matcha indang mezüingbuba batch ya Rs 3,000 agi auction asü. Iba ya J. Thomas & Co. Pvt. Ltd. ajanga asü aser Guwahati-nung amenoka aliba Sheosons Chai Co. ajanga alizük.

Matcha premium green tea lir aser Japan, China aser Vietnam nung yanglur.

Telungpurtemi Mali kübok tesem balala amak



Anefis, Mali nung telungpurtem "tsüngremji tulu" ta ayima gari nung mener aoba noksa nung angur.

Bamako,Chiteni/July 4 (Agencies): Mali nung telungpurtemi Honibarnü tesem pongu makogo, kong sorkar aser Russia nunger sepaitem amendaka aliba linük north len jila ka aser linük yimtiba south len jila ka amakba densema lir.

Telungpurtemi amakba yimti aser jilatem rongnung north len Anefis aser Aguelhoc, Mali teyongsü nung Gao aser Severe na aser south len Kenioroba densema lir, ta army-i ashiba state TV aser official social media channel tem ajanga metetdaksüogo. Parnokisa tensa kanga junga asandangdar, ta ashi.

Tuareg-i aniba telungpur telok Azawad Liberation Front (FLA) otongdar kati ashiba agi, Honibarnü tesem balala amak nung parnoka densema liasü. Iba telok yagi Al Qaeda den sendaka aliba Jama'at Nusrat al-Islam wal Muslimin (JNIM) den longjemer April ita linük yimtiba nung airport amak aser linük defence minister tepseta liasü.

JNIM puribo item tesemtem amakba indang nangzüka mali.

FLA otongdar, Mohamed Elmaouloud Ramadane-i ashiba agi, par telok nungi sepaitem Kidal region nung Anefis-i ia liasü. April ita tatalokba sülen Sorkar aser Russia nunger sepaitem iba tesemi yoker liasü.

Gao nung local ketdangsür kati ashiba agi, telungpurtemi rocket amshia military camp ka amak, saka koba teloki iba camp ya amak ajibo mejangja.

Severe nung alir kati Reuters dang ashiba agi, anepdang züngia prangbong akhaba ola angashiba sülen 8 ako shi nung bomb pezü apokba ola angashia liasü. Ajisüaka iba sülen süngjema kümogo, ta iba nisungba yagisa shisem.

Kenioroba nung Mali political opposition züngsemtem puoka aliba tepuokdak amenoka lir, ajisüaka iba tepuokdak ya amak mamak ajibo mejangja.

Linük kübok tesem balala amakba ajanga Mali nung military lenirtem tamakok sayur, shirnoki 2020 aser 2021 küm sorkar atsüng aser security jenjang tajungba kümdaktsütsü tenangzüka agüja liasü.

2024 küm september ita

JNIM-i, Bamako airport anasa paramilitary police training school ka amak aser nisung 70 tepseta liasü. Parokisa tawa totzü shibelenba nokdang aser iba ajanga linük yimtiba nung alirtem aser power o osettsüt shishilembaba nung tetsükdaktsü adoka liasü.

Mali sorkari tawa Washington den tesendaktep yanglushitsü merangdar, shirnoki security aser mining dak sendakba nung tesendaktep yanglushitsü benokogo.

Kasa mapang nung Russia, shirnoki Africa nung sorkar atsüngba military sorkartem nem teyari agüja arudar, parnoki April ita sülen Mali den nokdaktsü tenangzüka agüja liasü.

Jihadist temi kidanger Burkina Faso aser Niger na nunga timtem agüja arudar, shirnoki security teyari atema Russia dangi meyipogo.

June ita JNIM-i, Niger yimtiba nung airport aser military airbase amakba nangzükogo, koba taküm iba tesem tanabenbuba amakba liasü.

Russia-i Kostiantynivka yimti atsüngogo ta ashiba Ukraine-i magizük

Kyiv, Chiteni/July 4 (Agencies): Russia nunger sepaitemi Ukraine anütoklen kanga dang tongtiband Kostiantynivka yimti atsüngogo ta ashiba ya osang shitak masü, ta Ukraine indang general staff-i Honibarnü shiogo.

"Onoki iba osang ya magizüker. Iba ya teyazü lir," ta general staff ketdangsür kati ashi.

General Staff-i ashiba agi, Kostiantynivka ya tang tashi Ukraine nunger sepaitem tazüokba kübok lir.

"Military unit tem aser Eastern Grouping 19th Army Corps subunit temi maneni iba tesem nung tsükchirtem nokdangdar," ta kasa sangdong ajanga metetdaksü.

Russia military-i Hokolbarnü tir Vladimir Putin dang sepaitemi Kostiantynivka atsüngogo, ta metetdaksü. Donetsk region atsüngtsü atema Moscow atema iba yimti ya kanga tongtiband lir, aser parnoki mapang talangka merangdanga arudar.

Industry aika amenoka aliba Donetsk tesem kümzüka ayutsü atema Ukraine asoshi linük south len tongtiband yimti pezü rongnung Kostiantynivka-a ka lir.

Ken o asadangertemi ashiba agi, Kostiantynivka atsüngba ajanga Russia nunger sepaitem nem defensive belt north len atsüngyonga aotsü asoshi lenmang lapoktsütsü.

Russia military-i joko mapang tatsüka parnoki Kostiantynivka kübok tesem kar atsügogo ta shia arudar, koba Donetsk nung Ukraine indang "fortress belt" nung prangbong hadir peria amenoka aliba yimtitem rongnung ka lir.

Kasa mapang nung Ukraine-i drone aika yoka St Petersburg aser Leningrad region temeket nung tesem balala makogo, kong local port ka aser oil infrastructure ka densema lir, ta Russia aser Ukraine nunger

ketdangsürtemi metetdaksüogo.

St Petersburg Governor Alexander Beglov-i ashiba agi, nütsüngyongsük million 6 aliba yimti ya drone aikati makogo aser iba mapang yimti indang oil terminal dak kongshiogo. Paisa, lendong nung nisung asüba osangbo kecha mali ta shiogo.

Leningrad region Governor Alexander Drozdenko-ia, drone temi St Petersburg nungi km 170 shi pilar Baltic Sea nung Vysotsk rongnendak makogo. Iba rongnendak ajanga totzü, jang, nagmati aser liquefied natural gas shibelener.

Drozdenko-isa, Leningrad region tesem nung drone 72 khazüka yokogo, ta ashi.

Telegram nung post ka ajanga Ukraine tir Volodymyr Zelenskiy-i ashiba agi, "Ukraine defence force temi port oil infrastructure makogo, koba ajanga Russia rara atema senotsü aazüktsür aser iba den Kronstadt makogo, koba Ukraine arrtsü nungi km 850 dak tema pilar lir aser military target tongtiband ka lir."

Kronstadt amakba dak sendakba nung Russia-i osang kecha magütsü. Kronstadt ya St Petersburg anasa tongtiband naval base ka lir, koba Ukraine-i June ita-a makogo.

Ukraine-i taküm Russia indang energy infrastructure tem tali makdar, aser iba ajanga Russia kübok tesem balala nung totzü agi anünga kümdaktsüogo.

Maneni Russia kübok Bryansk region aser Crimea indang governor nati drone agi, amakba mapang tesem anaprongla nung nisung kaka tepsetogo aser aika yirutsüogo.

St Petersburg south len Pskov region governor-ia, man-ger mesangwa tsüngda parnoki drone 30 khazüka yokogo, ta ashi. Paisa, Velikiye Luki jila nung factory ka densema tesem kar terara raksaogo aser nisung kar yiruogo ta ashi.



United States-Iran na tenangzüktepba tasen yangluba ajanga alima nung energy shibelenba tzü lenmang tongtibandtiba lapoktsü atema timla agütsüogo. June ita onük 14 aketba MoU ka sign sütepba nung military operations anentsüba aser Strait of Hormuz lapoktsüba densema lir. Ajisüaka rong senzüba iba lenmang dak sendakba nung mangatettep aliba ajanga iba tenangzüktepba ya raksatsü akok ta tsübua bilemer.

GOVERNMENT OF NAGALAND
DIRECTORATE OF A.H.& VETERINARY SERVICES
NAGALAND :: KOHIMA
NO.VET/EST-3/LEGAL (Pt)/1/2026-27/1615-21
Dt. Kohima the 3rd July, 2026.

ADVERTISEMENT

In pursuance to the Hon'ble Gauhati High Court, Kohima Bench Judgement and Order dated 17.11.2025 W.P (C) No. 215/2023, W.P (C) No. 216/2023 W.P (C) No. 217/2023 and dated 26.11.2025 W.A No. 4/2024 and PIMS clearance No. 157 dated 23.6.2026, applications are hereby invited from eligible candidate for filling up 4 (Four) posts of Grade - 1V under the Department of A.H & Veterinary Services.

Sl. No.	Name of post	Number of Vacancy	Place of Posting	Pay Matrix	Remark
1.	Medicine Carrier	1	Veterinary Hospital, Mokokchung,	Level-1	Indigenous inhabitant of Mokokchung
2.	MTS	2	Veterinary Hospital, Mokokchung	Level- 1	
3.	Medicine Carrier	1	VHC, Sungro, CVO, Wokha	Level- 1	Indigenous inhabitant of Wokha

Eligibility criteria:
1. Minimum Educational Qualification: Class VIII.
2. Age limit: 18-32 years as on 1st July 2026.
3. Age relaxation : 5 years for ST candidates and for serving Government employees- equal years of service served, subject to a maximum of 5 years.
4. Application forms shall be issued from the Establishment Branch from 10:30 AM - 3:00 PM on 9th -10th July 2026 on payment of Rs. 100/- only.
5. Last date of form submission :20th July 2026.
6. Date of interview : 22nd July 2026.
Documents required:
1. Educational Qualification certificate.
2. Birth Certificate.
3. Indigenous inhabitant certificate.
4. Scheduled Tribe Certificate.
5. Aadhar Card.
6. NOC from HoD for Government employees (in original).
7. 2 (two) recent passport size photo.

Sd/-DR. KUOKEHEBI GWIRIE
DIRECTOR
A.H. & VETERINARY SERVICES.
NAGALAND : KOHIMA.

World Cup: Colombia, Argentina, Egypt round of 16-i iogo



(Abelen) Argentina aser Cape Verde na asayaba mapang Sidney Lopes Cabral-i Cape Verde atema tanabuba goal idaktsüba noksa nung angur. (Achiji) Ghana den asaya nung Colombia nung asayar Luis Diaz-i mezügbuba goal idaktsüba sülen Jhon Arias den pelatepba noksa nung angur.

TESÜSABA ASAYA OSANG				
Australia	1 (2)	1 (4)	Egypt	
Argentina	3	2	Cabo Verde	
Colombia	1	0	Ghana	
ROUND OF 16				
July 04	10:30 PM	Canada	VS	Morocco
July 05	2:30 AM	Paraguay	VS	France
July 06	1:30 AM	Brazil	VS	Norway
July 06	5:30 AM	Mexico	VS	England
July 07	12:30 AM	Portugal	VS	Spain
July 07	5:30 AM	USA	VS	Belgium
July 07	9:30 PM	Argentina	VS	Egypt
July 08	1:30 AM	Switzerland	VS	Colombia

Chiteni/July 4, 2026 (Agencies): Hokolbarnü Ghana den asaya goal 1-0 agi akokba sülen Colombia tang asaya aliba FIFA World Cup Round of 16-i iogo. Asaya ya Colombia-i tetenzük nungi azioka asaya saka parnoki goal agütsüsü maongka aika anguba magiteti liasü.

Ajisüaka Jhon Arias-i asaya mezügbuba shilem nung goal ka idaktsüba ya asaya akoktsü atema Colombia asoshi teperai liasü. Parnok Mongolbarnü Vancouver nung Switzerland den asayatsü. Iba asaya nung Ghana team-i target nung ball ka danga memetsüoktsütet.

Asaya nung Colombia-i goal nung tiben metsüoktsü, saka ka

dang idaktsüteta liasü.

Kasa asayamung tanga asaya ka nung Argentina-i kanga meranga asayarang Cape Verde goal 3-2 agi koka round of 16 tongtetogo. Iba asaya nung Lionel Messi-i pa indang career nung World Cup goal 20buba idakja liasü.

Messi-i taküm iba asayamung nung asaya pezü nung goal tenet idaktsüogo. Verde den asaya nung pai mezügbuba goal idakja par team tejakdang toktsü.

Ajisüaka Verde atema Deroy Duarte-i asaya tanabuba shilem nung goal ka idakja goal kasasa aküm.

Maneni extra time nung

Lisandro Martinez-i Argentina atema tanbuba goal idakja mapang tatsüka atema parnok tejakdang aküm saka Sidney Lopes Cabral-i iba goal küptoka liasü.

Asaya draw nung tembangtsü akok ta bilema aliba mapang Messi-i metsüba corner ka Cristian Romero-i tongoktsüba Diney Borges dak tsükdaker ia Argentina-i iba asaya goal 3-2 agi koka liasü.

Argentina pur round of 16 nung Mongolbarnü Egypt den Atlanta nung asayatsü. Argentina ya asayamung akoktsü imlaba team tem rongnung ka lir, saka iba asaya sülen parnok asaya dak tebilemtsü aliba

reprangtetogo.

Maneni tanga asaya ka nung Egypt aser Australia na penalty metsütepba sülen Egypt-i asaya goal 4-2 agi koka round of 16 tongtetogo.

Texas nung team ana tsüingda minute 120 asayaba ya goal 1-1 agütsür tembangba sülen penalty metsüteptsüsa aküm.

Asaya nung mezügbuba goal ya Egypt nungi asayar Emam Ashour-i minute 13buba nung idakja liasü.

Iba sülen asaya tanabuba shilem tenzüker minute 10buba nung Mohamed Hany-i par goal nung ball ka tongokja goal kasasa aküm.

Team anaprongla yagi tang

tashi nung tebur World Cup asaya nung knockout asaya ka danga koker maliasü.

Goal kaka nung asaya tembanga penalty metsütepba mapang Australia atema defender Harry Souttar-i mezügbuba penalty metsü, saka pai metsüba ball ya post adena metsütok.

Iba sülen Salah densema asayar pongupronglai goal idaktsü, saka Australia nung arishi küm 18 tain defender Lucas Herrington-i bar nung ball metsüoktsü.

Egypt asoshi tatembangbuba penalty ya Abdelmaguid-i aibelen mesüi idakja parnoki asaya koka liasü.

Djokovic-i Federer-i record yanglur aliba menepogo



Federer

Djokovic

Chiteni/July 4, 2026 (Agencies): Hokolbarnü Wimbledon tebur kija asaya nung France nung asayar Arthur Rinderknech akokba sülen Novak Djokovic round pezübubai iogo.

Iba asaya akokba sülen Roger Federer-i Wimbledon nung asaya timtiba akokba record yanglur aliba pai menepa kasa kümogo.

Arishi küm 39 tain asayar yagi iba asaya 7-5, 6-4, 1-6, 7-6(4) agi koka All England Club nung asaya 105buba koka Federer den kasa kümogo. Djokovic-i round pezübuba nung asaya kokra pai Swiss nung

nüngtugu asayar ya ajatettsü.

Iba asaya akokba sülen Djokovic-i ano Federer-i tongteter aliba alizüing ka tongteta pa indang career nung Wimbledon round pezübubai 18benbuba iogo.

Maneni Serbia nung asayar ya Wimbledon title tibenbuba abentsü merangdar. Pai taküm iba asayamung kokra Federer den kasa akümstsü, shibai iba grass-court Grand Slam ya tiben koker lir. Maneni pa Grand Slam nung tebur kija asaya 25benbuba akoktsü atema joko mapang tatsüka meranga arudar.

Asaya nung Djokovic-i

mezügbuba set ana ya amokbanger asaya aser Rinderknech nem kecha maongka magütsü.

Ajisüaka tasenbuba set nungbo France nung asayar yagia kanga toktepa asaya-a takok angu aser set pezübuba nunga tiebreak asayaba sülenang Djokovic nem asaya kokdakja liasü.

Djokovic taruba asaya Russia nung Roman Safiullin den asayatsü. Pai asaya kokyonga tura pa semifinal nung world No. 1 Jannik Sinner den asayatsü akok, shibai America nung asayar Jenson Brooksby straight sets nung kokogo.

Khaka maneni Sunderland nungi asayatsü

Chiteni/July 4, 2026 (Agencies): Sunderland captain Granit Xhaka Chelsea-i alizüktsü tejangraba liaka pa club nungi maneni asayatsü.

Switzerland nung midfielder shiba indang contract 2028 küm atemtsü, pa Chelsea manager Xabi Alonso den longjemtsü maongka aliba ajanga atsüa arua liasü. Tena Bayer Leverkusen nung külemi inyaka liasü.

Chelsea-i Xhaka atema pound million 8 agütsüsü shidang, saka Sunderland-i taoba hopta magizük. Chelsea puri pa atema offer tajungba ka agütsüshitsü imlar.

Ajisüaka Sunderland kübok source balalai BBC Sport dang ashiba agi, arishi küm 33 tain asaya ya ayoktsüba atema masü, aser sensaksem ka agiba sülen Xhaka-i club nung maneni asayatsü atema bendanga agütsüshio.

Xhaka alizüktsü atema Chelsea pur timla mesamai lir aser club source balala ajanga ashiba agi, taoba mapang Ar-

senal midfielder ya Stamford Bridge-i aotsü atema tejangraba lir.

Bayer Leverkusen nungi arua adenba sülen Xhaka lenisüba nung Sunderland pur küm 53buba nung tang mezügbuba Europe nung asayamung atema qualify sütetogo.

Taoba season pa Premier League nung 34 ben asaya aser Sunderland pur tenetbuba nung tembanga Conference League atema qualify sütetogo.

Switzerland captain ya Arsenal nungi küm tenet asaya aser iba mapang pa asaya 297 nung asaya liasü. Iba sülen 2023 küm pa Leverkusen-i ao aser Alonso lenisüba nung iba German club yagi mezügbuba Bundesliga title abenba nung pai teyari agüja liasü.

Xhaka ya tang US, Mexico aser Canada nung asaya aliba World Cup nung Switzerland tenüng nungi asayadar. Iba asayamung nung pa tang tashi nung Switzerland pur asaya ajak nung asayaogo.

BILEMDANGANG

"Sorobangrobo yabo raksatsü, saka yimya awashi tajugbo teti alitsü."